



## Umsögn

### Efni: Breyting á reglugerð nr. 1212/2015 um bókhald, fjárhagsáætlanir og ársreikninga sveitarfélaga.

Samgöngu- og sveitarstjórnarráðuneytið hefur til umsagnar tillögu að breytingu á ákvæði 20. gr. reglugerðar nr. 1212/2015 um bókhald, fjárhagsáætlanir og ársreikninga sveitarfélaga.

- Mál nr. 122/2020, drög að breytingu á reglugerð nr. 1212/2015.

### Umsögn fjármála- og áhættustýringarsviðs Reykjavíkurborgar

Í samanteknum ársreikningum A + B hluta sveitarfélaga hefur verið beitt almennum reikningsskilareglum varðandi dóttur- og hlutdeildarfélög. Með tillögu að breytingu á 20. gr. reglugerðar nr. 1212/2015 er lagt til að sérregla verði sett varðandi meðhöndlun byggðasamlaga í samanteknum ársreikningi sveitarfélaga. Sérreglan snýr að því að hvert og eitt sveitarfélag sem er aðili að byggðasamlagi skal í samanteknum ársreikningi notast við hlutfallslega ábyrgð sveitarfélagsins í byggðarsamlaginu við færslu eigna, skulda, tekna og gjalda í samanteknum reikningsskilum óháð stærð eignarhluta.

Þetta þýðir þá breytingu að minnihlutaeigendur byggðasamlaga þurfa við færslu eigna, skulda, tekna og gjalda í samanteknum reikningsskilum að taka tillit til eigna, skulda, tekna og gjalda í samanteknum reikningsskilum í byggðasamlaginu og sama gildir um eiganda meirihluta.

Fjármála- og áhættustýringarsvið Reykjavíkurborgar leggur til að lengra verði gengið í þessum efnum og gerir tillögu um eftirfarandi breytingar á drögum um breytingu á reglugerð nr. 1212/2015:

1. Lagt er til að breytingar skv. b lið 1. gr. breytingartillögunnar nái ekki eingöngu til byggðasamlaga sveitarfélaga heldur einnig til sameignarfyrirtækja og sameignarfélaga sveitarfélaga.
2. Lagt til að reglugerðarbreytingin taki gildi 1. janúar 2021.

Starfsemi sveitarfélaga er fjölbreytt og starfa þau saman tvö eða fleiri að ýmsum verkefnum. Samstarfið er með ýmsum hætti og er rekið í mismunandi félagaformum. Til að ná fram markmiði breytingartillögunnar um að tekjur, gjöld, eignir, skuldir og skuldbindingar birtist hjá réttum ábyrgðaraðila er nauðsynlegt að taka fleiri sameignarfélagaform inn í reglugerðartextann þar sem ábyrgð allra eigenda slíkra félaga er með hliðstæðum hætti og í byggðasamlögum.



**Tillaga Fjármála- og áhættustýringarsviðs Reykjavíkurborgar að breyttum texta nýrrar reglugerðar (breytingar rauðmerktar).**

REGLUGERÐ

um breytingu á reglugerð nr. 1212/2015 um bókhald, fjárhagsáætlanir og ársreikninga sveitarfélaga.

1. gr.

Eftirfarandi breytingar verði á 20. gr. reglugerðarinnar:

a. 3. – 5. mgr. falla brott.

b. Ný málsgrein bætist við svohljóðandi:

Byggðasamlög, sameignarfyrirtæki og sameignarfélög sveitarfélags skulu í samanteknum reikningsskilum miða við hlutfallslega ábyrgð sveitarfélagsins í ofangreindum félögum við færslu eigna, skulda, tekna og gjalda óháð stærð eignarhluta.

2. gr.

Reglugerð þessi, sem sett er á grundvelli 75. gr. sveitarstjórnarlaga nr. 138/2011, öðlast þegar gildi þann 1. janúar 2021.

*Gísli Hlíðberg Guðmundsson*  
*borgarbókari*